

Расулulloҳ соллаллоҳу алайҳи васалламнинг уйқулари

20:01 / 28.04.2017 5191

Анас розияллоҳу анҳу бизга Набий соллаллоҳу алайҳи васалламнинг Каъба масжидидан исро қилдирилганлари ҳақида гапириб шундай деди:

«Ул зотга ваҳий қилинишидан олдин уч нафар келди. Ул зот Масжидул Ҳаромда ухлаб ётар эдилар. Бас, уларнинг аввалгиси:

«У буларнинг қайси бири?» – деди.

Ўртаси:

«У буларнинг энг яхшисидир», – деди.

Охиргиси:

«Буларнинг энг яхшисини олингиз», – деди.

Ўшанда бир марта бўлган эди. Кейин у зот уларни бошқа бир кечада, то қалблари кўрадиган бўлгунларича кўрмадилар.

Набий соллаллоҳу алайҳи васалламнинг кўзлари ухлар эди. Қалблари ухлмас эди. Шунингдек, барча Набийларнинг кўзлари ухлайди-ю, қалблари ухламайди. Бас, у зотни Жаброил олиб, сўнгра осмонга бирга олиб чиқиб кетди».

Муҳаммад Мустафо соллаллоҳу алайҳи васаллам Набий бўлишларидан олдин Масжидул Ҳаромда амакилари Ҳамза ибн Абдулмуттолиб ва бошқа бир амакиларининг ўғли Жаъфар ибн Абу Толиб билан ухлаб ётар эдилар. Шунда уч нафар фаришта: Жаброил, Микоил ва Исрофил алайҳиссалом келишди.

Шунда Жаброил алайҳиссалом:

«У буларнинг қайси бири?»–деди».

Яъни, Муҳаммад бу ухлаб ётганларнинг қайси бири? Бу саволга Микоил алайҳиссалом:

«У буларнинг энг яхшисидир»,–деб жавоб бердилар.

Жавобни эшитгандан кейин Исрофил алай→ҳиссалом:

«Буларнинг энг яхшисини олингиз»,–деди».

Бундан Муҳаммад Мустафо соллаллоҳу алайҳи васаллам Набий бўлишларидан аввал ухлаб ётганларида ҳузурларига фаришталар келганини билмаганлари маълум бўлади.

Аммо, у зотга ваҳий тушганидан кейин исро кечасида Жаброил алайҳиссалом келганларида билганлар. Чунки:

«Набий соллаллоҳу алайҳи васалламнинг кўзлари ухлар эди. Қалблари ухламас эди. Шунингдек, барча Набийларнинг кўзлари ухлайди-ю, қалблари ухламайди».

Улар ўзларига ҳар лаҳзада келиб қолиши мумкин бўлган ваҳийни қабул қилиб олишга доим тайёр туришлари керак.

Оиша розияллоҳу анҳодан ривоят қилинади:

«Ё Расулуллоҳ, Витр ўқишдан олдин ухлайсизми?» – дедим.

«Кўзим ухлайди. Қалбим ухламайди», – дедилар у зот».

Иккисини Икки Шайх ривоят қилишган.